

Lettre Jèrriaise 27/04/24

Bouônjour tout l'monde. Ch'est Ken Vibert dé Grosnez tchi vos présente la lettre Jèrriaise aniet Sanm'di lé 27 d' Avri 2024.

Y'a tchiques semaines j'tais à r'garder man bieu fis à touôner. Vraîment la terre 'tait trop mouoillie auprès toute la plyie qu' j'aviônme ieu à ches drein, mais i' 'tait dans un clios d'crüethe tch'avait 'té en hêrbe pour un coupl'ye d'années. Le clios avait toute la vèrduthe dé brûlée et i' restait qu' les rachinnes secques et enfouies. Il arrivit auve son grand vèrt tracteu, tch'est grand comme eune maîson auve des reues driêthe pus hautes qu' un homme. Pouor y monter d'ssus y'a une montée dé quat' d'grés, et eune fais dans la cabanne nou pense véthitabliément d'être dans la cabanne d' eune avion. Ch'est qu' des boutons et d's hêlouoges partout. À la drouaite dé où'est qu' nou-s'-est assis y'a une dgiêxaine dé barres dé difféthentes couleurs, et à la gauche un deuxième siège. Jé n'sis pon du tout râvi tch'i' n'est pon trop hardi dé m'laïssi l'cachi. Sa tchéthue est un brabant dé quat' randes, v'là tchi veurt dithe qué quand i' veint au but du clios i' lève la tchéthue et ou s'renvêrse et les quatre autres tchéthues sont prêtes pouor èrvenîn avau l' clios. I' faut des fouoyêthes d'au mains douze pas. Man grand-pêthe éthait dit qu' ch'tait la maîntchi du clios ch'na. Quand i' pique sa tchéthue dans la tère ou trouve san nivé tch'est contrôlé par iun des boutons. I' cache à raide vitesse, et en touône chîn vrégies dans eune p'tite heuthe, tout à fait èrmèrquabl'ye.

Quand j'tais assis sus l'fôssé du clios j'tais à penser combein difféthent que ch'tait dans man temps quand j'mé mîns à fèrmer. J'avais un p'tit tracteur sans cabanne et auve eune tchéthue d'eune rande et j'touônnais à faiter, ch'est à dithe c'menchi au mitan du clios et faithe

alentou jusqu'à ch'qué j'arrivais ès fôssés. Ou bein j'touônnais à déj'ter, où'est qué j'c'menchais alentou du clios et j'finissais au mitan.

J'm' èrsouveins qué man bieu péthe m'ttait deux pathes dé braies et un coupl'ye dé câsaques quand i' faisait hardi froid, et il avait un chapé portûndgais en laine tch'avait une langue dé chaque côté pour li garder les ouothelles d'attraper des r'fraideuses. Quand i' r'venait à la maïson auprès deux ou bein trais heuthes à touôner, les ièrs li coulaient et il avait un nez comme Rudolf, lé chère à Papa Noué. Ch'est pon comme aniet ou'est qu' la cabanne est clyînmatisée et caûffée et l'cacheu peut-être à la c'mînse dans mitan d'l'Hivé.

Lé temps pâssé y'avait hardi d'travas tchi 'tait fait à la bêque, quand nou-s-'ouvrait eune raie i' fallait la poudrer d'avant dé c'menchi à touôner et quand nou finissait, i' fallait bêtchi lé long du fôssé et pis remplyi la raie, tout à la bêque. Acouo piéthe ch'tait quand nou touônnait à déj'ter et qu'y'avait deux raies à remplyi dans l'mitan du clios. Nou 'tait oblyigis d'fouie l'mitan d'avant d'rabillyi des deux côtés. Bien seux, i' n'y'avait pas d'pèrte dé tèrre dans chu temps-là, nou pliantait jus'qu'au fôssé et même nou fouait les carres pour les plianter. Achteu nou vait des bêques raïque quand i' mettent lé pliastique, les carres n'sont pas fouîtes ou pliantées et y'a des pèrtes dé tèrre, laïssi à paitre ès "cockoos". Nou nos dit qu' ch'est l'progrès, mais, j'ai mes doutes. Malheureusement ch'est comme bein des choses dans la vie aniet, bein trop d'gaspill'lie.

Et bein n'en v'là assez pour aniet. J'espéthe que l'Êté s'en va être caud et qu'ou pouvez en rêjouie. Mèrcie d'm'aver êcouté.